

VENDIM
Nr. 235, datë 1.4.2026

**PËR DISA NDRYSHIME DHE SHITESA NË VENDIMIN NR. 712, DATË 31.7.2013,
TË KËSHILLIT TË MINISTRAVE, “PËR PËRCAKTIMIN E PROCEDURAVE TË
KONKURRIMIT PUBLIK PËR TË DREJTËN E PESHKIMIT NË UJËRAT E
BRENDSHME, FORMAT E TJERA TË PESHKIMIT NË DET, PA PËRDORIMIN E
MJETEVE LUNDRUESE, DHE ZHVILLIMIN E AKUAKULTURËS NË
SIPËRFAQE PUBLIKE, TOKËSORE DHE UJORE”, TË NDRYSHUAR**

Në mbështetje të nenit 100 të Kushtetutës dhe të pikës 3, të nenit 52, të ligjit nr. 64/2012, “Për peshkimin”, të ndryshuar, me propozimin e ministrit të Bujqësisë dhe Zhvillimit Rural, Këshilli i Ministrave

VENDOSI:

I. Në vendimin nr. 712, datë 31.7.2013, të Këshillit të Ministrave, “Për përcaktimin e procedurave të konkurrimit publik për të drejtën e peshkimit në ujërat e brendshme, format e tjera të peshkimit në det, pa përdorimin e mjeteve lundruese, dhe zhvillimin e akuakulturës në sipërfaqe publike, tokësore dhe ujore”, të ndryshuar, bëhen këto ndryshime dhe shtesa:

1. Pikat 11/1, 12 dhe 12/1 shfuqizohen.

2. Pikat 13, 14 e 15 ndryshohen, si më poshtë vijon:

“13. Për kryerjen e procedurave të konkurrimit publik për ushtrimin e veprimtarisë së peshkimit në ujërat e brendshme, për format e tjera të peshkimit në det pa përdorimin e mjeteve lundruese dhe për zhvillimin e aktivitetit të akuakulturës në sipërfaqe publike, tokësore dhe ujore, ngrihet Komisioni i Vlerësimit të Kërkesave me urdhër të ministrit. Për ujëmbledhësit e bujqësisë në përgjegjësi administrimi të njësisë të vetëqeverisjes vendore, Komisioni i Vlerësimit të Kërkesave ngrihet me urdhër të titullarit të njësisë së vetëqeverisjes vendore, nën juridiksionin territorial të së cilës ndodhet ujëmbledhësi i bujqësisë.

14. Komisioni i Vlerësimit të Kërkesave, në përmbushje të detyrimeve të tij, kryen procedurat e mëposhtme:

a) Shkarkon dokumentacionin e depozituar në format elektronik gjatë procesit të aplikimit nëpërmjet portalit unik qeveritar “e-Albania”, ruan një kopje elektronike të tij dhe harton procesverbalin e hapjes së konkurrimit;

b) Kryen procesin e vlerësimit të dokumentacionit të paraqitur brenda 20 (njëzet) ditëve kalendarike edhe në rastin kur për objektin ujqor të shpallur për konkurrim është paraqitur një konkurrues i vetëm;

c) Verifikon nëpërmjet institucionit përgjegjës për shërbimet e peshkimit dhe akuakulturës, nëse subjekti konkurrues mbart detyrime financiare dhe nëse ndaj tij ka masa administrative;

ç) Në rastin kur konstatohen pasaktësi në kërkesën e paraqitur, kërkuesit i kërkohet në rrugë zyrtare që të korrigjojnë pasaktësitë ekzistuese në dokumentacionin e kërkuar, brenda 7 (shtatë) ditëve nga marrja e njoftimit. Kur kërkuesi plotëson pasaktësitë në dokumentacionin brenda afatit të përcaktuar, kërkesa quhet e regjistruar nga dita që është dërguar. Kur kërkuesi nuk i plotëson brenda afatit të caktuar, kërkesa quhet se nuk është regjistruar;

d) Në përfundim të afatit të përcaktuar në shkronjën “ç” të kësaj pike, vlerëson me pikë dhe merr vendim brenda 15 (pesëmbëdhjetë) ditëve kalendarike, sipas çdo elementi konkurrimi;

dh) Harton procesverbalin e zhvillimit të konkurrimit, ku përshkruhen pjesëmarrësit, konkurrentët e skualifikuar dhe arsyet e skualifikimit, si dhe renditja e subjekteve të kualifikuara sipas vlerësimit me pikë;

e) Paraqet te titullari procesverbalin e zhvillimit të konkurrimit dhe vendimin për miratimin e procedurës brenda 7 (shtatë) ditëve;

ë) Njoftimi për rezultatet e konkurrimit dërgohet për publikim në Buletinin e Njoftimeve Publike dhe njoftimi vlerësohet i kryer brenda 10 (dhjetë) ditëve nga data e botimit.

15. Pas përfundimit të procedurave të sipërpërmendura, titullari i institucionit lidh kontratën për zhvillimin e veprimtarisë së kërkuar dhe të miratuar në procesin e konkurrimit me subjektin fitues brenda 30 (tridhjetë) ditëve kalendarike nga dita e përfundimit të shqyrtimit të ankimit, nëse ka.”.

3. Pikat 16 dhe 16/1 ndryshohen, si më poshtë vijon:

“16. Kontrata tip, e cila lidhet me subjektin fitues, miratohet me urdhër të ministrit.

16/1. Për monitorimin e kontratave ngarkohet struktura përgjegjëse për monitorimin e kontratave. Procesi i monitorimit të kontratave përcaktohet me udhëzim të ministrit.”.

4. Pikat 17, 17/1 dhe 17/2 ndryshohen, si më poshtë vijon:

“17. Subjektet konkurruese kanë të drejtën e ankimit brenda 30 (tridhjetë) ditëve nga përfundimi i afatit të përcaktuar në shkronjën “ë”, të pikës 14, të këtij vendimi.

17/1. Brenda 10 (dhjetë) ditëve nga paraqitja e ankesës, me urdhër të titullarit ngrihet Komisioni i Shqyrtimit të Ankesave, me 3 (tre) anëtarë, që ka në përbërje:

a) një specialist të fushës;

b) një ekonomist;

c) një jurist.

17/2. Komisioni i Shqyrtimit të Ankesave merr vendim, për:

a) pranimin e ankesës, duke rivlerësuar dokumentacionin dhe procedurën në rast se vlerëson se në procedurën konkurruese janë shkelur kriteret procedurale apo ka pasur parregullsi në kryerjen e vlerësimit të kërkesave;

b) mospranimin e ankesës dhe lënien në fuqi të vendimit të Komisionit të Vlerësimit të Kërkesave, në rast se vlerëson se në procedurën konkurruese nuk janë shkelur kriteret procedurale apo nuk ka pasur parregullsi në kryerjen e vlerësimit të kërkesave.”.

5. Pas pikës 17/2 shtohet pika 17/3, me këtë përmbajtje:

“17/3. Shqyrtimi i ankesës përfundon brenda 30 (tridhjetë) ditëve kalendarike nga data e përfundimit të afatit të ankimit sipas pikës 17 të këtij vendimi. Komisioni merr në shqyrtim njëkohësisht të gjitha ankesat, në rast se ka më shumë se një ankesë, për të njëjtën procedurë konkurrimi dhe për çdo ankesë merr një vendim të veçantë duke njoftuar subjektin ankimues.”.

6. Pika 18 ndryshohet, si më poshtë vijon:

“18. Afati i kontratës për ushtrimin e veprimtarisë së peshkimit në ujërat e brendshme, për format e tjera të peshkimit në det, pa përdorimin e mjeteve lundruese është 10 (dhjetë) vjet.”.

7. Pas pikës 19 shtohet pika 19/1, me këtë përmbajtje:

“19/1. Për ujëmbledhësit e bujqësisë në përgjegjësi administrimi të njësive të vetëqeverisjes vendore, procedurat e konkurrimit zhvillohen nga njësia e vetëqeverisjes vendore, nën juridiksionin territorial të së cilës ndodhet ujëmbledhësi i bujqësisë, sipas pikave 5, 5/1, 5/2, 11, 12/2, 13, 14, 15, 16/1, 17/1, 17/2 dhe 18, të këtij vendimi.”.

II. Ngarkohen Ministria e Bujqësisë dhe Zhvillimit Rural dhe njësitë e vetëqeverisjes vendore për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR

Edi Rama